



Broj:03/3-50-1-377-2/07
Sarajevo, 29. maja 2007. godine

ZA PISNIK
2. sjednice Zajedničke komisije za ekonomske reforme i razvoj
Parlamentarne skupštine Bosne i Hercegovine,
održane 29. maja 2007. godine

Sjednica je počela u 13 sati.

Sjednicom je predsjedavao Drago Ljubičić, predsjedavajući Komisije.

Sjednici su prisustvovali: Bajazit Jašarević, Rudo Vidović, Rifat Dolić, Azra Hadžiahmetović, Hadži Jovan Mitrović, Hazim Rančić, Mehmed Suljkanović, Slobodan Šaraba, članovi Komisije.

Opravdano su odsustvovali: Ivo Miro Jović, Jovan Todorović i Adem Ibrahimpašić.

Sjednici su prisustvovali: Steve Lee, savjetnik u Odjelu za demokratizaciju za program jačanja zakonodavne vlasti OSCE-a, i Emira Češljarić, sekretar Komisije za vanjsku trgovinu i carine u Predstavničkom domu.

Kako radno mjesto sekretara Komisije nije popunjeno, na prijedlog Kolegija Sekretarijata, Emira Češljarić je Odlukom kolegija oba doma, broj:01,02,-34-1-494-1/07, od 8.5.2007., imenovana za privremenog sekretara Zajedničke komisije za ekonomske reforme i razvoj od dana njenog osnivanja.

Za sjednicu je predložen i jednoglasno usvojen sljedeći

DNEVNI RED

1. Usvajanje Zapisnika Konstituirajuće sjednice Komisije,
2. Dogovor o izradi Orijentacionog radnog plana Zajedničke komisije za ekonomske reforme i razvoj Parlamentarne skupštine Bosne i Hercegovine za 2007. godinu,
3. Tekuća pitanja:
 - a) Upoznavanje s materijalom Istraživačkog sektora Sekretarijata Parlamentarne skupštine BiH o temi „Ekonomske reforme“, od 3.5.2007.,
 - b) Informacija o održavanju 4. foruma PRSP-a (Strategija za smanjenje siromaštva) za zemlje zapadnog Balkana, koji će biti održan 26. i 27. juna 2007. u Atini.

Ad-1.

Zapisnik Konstituirajuće sjednice Zajedničke komisije za ekonomske reforme i razvoj usvojen je jednoglasno, bez primjedbi.

Ad-2.

Dogovor o izradi Orijentacionog radnog plana Zajedničke komisije za ekonomske reforme i razvoj Parlamentarne skupštine Bosne i Hercegovine za 2007. godinu

Orijentacioni radni plan, kao radni materijal, podijeljen je članovima Komisije na sjednici.

Predsjedavajući Komisije upoznao je prisutne o razlozima zbog kojih do sada nije zakazivana sjednica Komisije te o tome da je 21. maja 2007. godine sa zamjenicima predsjedavajućeg i sekretarom Komisije dogovoren dnevni red i termin održavanja 2. sjednice. Prilikom izrade Orijentacionog radnog plana treba poštivati odredbe poslovnika domova o djelokrugu Komisije i uzeti u obzir Plan rada Vijeća ministara BiH. Potrebno je ostvariti koordinaciju s Direkcijom za evropske integracije BiH, Direkcijom za ekonomsko planiranje, Ministarstvom vanjske trgovine i ekonomskih odnosa BiH, Agencijom za unapređenje stranih investicija u BiH (FIPA) te Izvozno-kreditnom agencijom (IGA). U radnom planu treba ostaviti mogućnost za njegovu dopunu u okviru saradnje s navedenim institucijama.

U raspravi su učestvovali: Azra Hadžiahmetović, Rifat Dolić, Drago Ljubičić i Mehmed Suljkanović.

Azra Hadžiahmetović rekla je da je Orijentacioni plan skroman i da bi trebalo precizirati koje će zakone Komisija razmatrati, uključiti inicijative i saradnju sa Svjetskom bankom, WTO, Evropskom komisijom i MMF-om, koji je u tranziciji ključni koordinator za svaku zemlju pojedinačno, te raspolagati s relevantnim informacijama koje se odnose na ekonomske reforme i razvoj.

Istakla je da ima mnogo poziva za učešće članova Parlamentarne skupštine BiH na međunarodnim skupovima u raznim oblastima, ali nema povratnih informacija i izvještaja s tih skupova. Kolegiji domova treba da imaju u vidu posebnu orijentaciju članova i delegacija Parlamentarne skupštine BiH, za određenu oblast, koji će učestvovati na određenim skupovima. Na ovom planu potrebno je uspostaviti sistem koji će imati povratnu snagu.

Rad na ekonomskim reformama nije samo koordinacija s državnim institucijama, potrebno je uspostaviti vezu sa svim institucijama koje se bave ovom problematikom, tematski dogovoriti način rada, apostrofirati prioritete u procesu ekonomskih reformi i razvoja i dati im evropsku dimenziju. Naglasila je da je ova komisija najznačajnija u Parlamentarnoj skupštini BiH imajući u vidu period koji je pred nama.

Rifat Dolić rekao je da je diskusija Azre Hadžiahmetović na stručan način usmjerena na institucije bitne za komuniciranje u djelokrugu Komisije čiju saradnju treba posmatrati kroz odredbe poslovnika domova. Operativni izvršilac reformi je Vijeće ministrara BiH koje treba dostavljati informacije.

Veoma je značajno biti informiran o tome šta se radi na polju ekonomskih reformi u okruženju i svijetu, a samo educirani članovi Komisije moći će udovoljiti zahtjevima.

Drago Ljubičić apostrofirao je da treba ostvariti komunikaciju s predloženim institucijama, uključiti Vijeće ministara BiH i sve državne institucije, VTKBiH, nevladine asocijacije, Sindikat BiH, Ured za veterinarstvo, DERK, Konkurencijsko vijeće, Institut za mjeriteljstvo, asocijacije poslodavaca.

Komisija je jednoglasno zaključila: da je s navedenim primjedbama usvojila Orijentacioni radni plan s mogućnošću njegove korekcije i dopune u daljnjem radu, zavisno od materije, uz ostvarivanje maksimalne saradnje s Vijećem ministara BiH i svim institucijama vezanim za oblast ekonomskih reformi i razvoja kao i saradnje s nevladinim sektorom.

Ad-3.

Tekuća pitanja:

a) Upoznavanje s materijalom Istraživačkog sektora Sekretarijata Parlamentarne skupštine BiH o temi „Ekonomske reforme“, od 3.5.2007.

Sekretar Komisije upoznala je prisutne o stavu Kolegija Predstavničkog doma da bi navedeni materijal Istraživačkog sektora trebalo da bude predmet rasprave na Komisiji s ciljem njegovog proučavanja i eventualne pripreme materijala koji bi poslužio kao osnova za raspravu na sjednici Doma.

Kako bi se poštovali poslovnici, Komisija je **zaključila** da se zatraži stav Kolegija Doma naroda o navedenom materijalu. Nakon toga, Komisija će ponovo razmatrati materijal i o konačnom stavu obavijestiti kolegije oba doma.

Steve Lee je u obraćanju članovima Komisije čestitao na usvajanju radnog plana i ponudio saradnju s OSCE-om. Rekao je da Istraživački sektor nema osoba koje bi radile puno radno

vrijeme. OSCE, po potrebi, asistira u izradi određenih materijala. Kada se radio navedeni materijal, imalo se na umu da će se koristiti u budućem radu. Cilj je bio da se da presjek ekonomskih reformi u zemlji; ko su nosioci ekonomskih reformi (VMBiH, MMF); pomoć parlamentarcima u radu, davanje smjernica, da li Vijeće ministara BiH izvršava svoje obaveze o ovim pitanjima; odgovoriti o pitanjima ekonomskih reformi.

Bajazit Jašarević rekao je da treba poštivati Poslovnik te da je materijal zamišljen kao osnova za ozbiljnu raspravu. Mišljenja je da Kolegij treba zatražiti stav Vijeća ministara BiH, a da se Istraživački sektor prihvati kao kreator materijala.

Azra Hadžiahmetović rekla je da je materijal izvještaj s osnovnim podacima - background koji se ne bavi reformama i zadacima Vijeća, nego ostvarivanjem komunikacije s Istraživačkim sektorom te da Komisija napravi informaciju, gdje se BiH nalazi u poređenju s drugim zemljama. Potrebno je apostrofirati prioritete u narednom periodu da Istraživački sektor radi i za potrebe Komisije i ne treba da ima samo informativni karakter.

Drago Ljubičić istakao je da nije sporno po članu 50. stav (1) b) Poslovnika Doma naroda da ovaj materijal može razmatrati Komisija u svojoj nadležnosti.

Rifat Dolić ne smatra da je ovo materijal o kojem treba odlučivati, nego da je on osnova za raspravu Komisije.

Komisija je **jednoglasno zaključila**:

1) materijal Istraživačkog sektora Parlamentarne skupštine BiH prihvata se kao polazna osnova za sagledavanje stanja u ekonomskim reformama u BiH;

2) uputiti dopis Kolegiju Doma naroda da Komisiju obavijesti o tome kakav je stav zauzeo o materijalu, da bi ga na narednoj sjednici ponovo razmatrala i o zaključku informirala domove Parlamentarne skupštine BiH.

b) Informacija o održavanju 4. foruma PRSP-a (Strategija za smanjenje siromaštva) za zemlje zapadnog Balkana, koji će biti održan 26. i 27. 2007. juna u Atini

Sekretar Komisije upozнала je prisutne da je Svjetskoj banci trebalo poslati prijedlog tri člana Komisije za učešće u radu 4. foruma za zemlje zapadnog Balkana, koji organizira Svjetska banka u saradnji s Ministarstvom vanjskih poslova Grčke, koji će biti održan 26. i 27. juna 2007. godine u Atini. Glavne teme Forumu odnose se na stanje u sektoru energetike te na reforme koje se provode ili planiraju. Inače, Forum je zamišljen kao razmjena informacija i iskustava zemalja učesnica o suštinskim pitanjima iz ove oblasti (BiH, Srbije, Crne Gore, Albanije, Kosova i Makedonije). Predsjedavajući i zamjenici predsjedavajućeg, zbog nedostatka vremena, predložili su 18. maja 2007. godine Svjetskoj banci **delegaciju u sastavu: Drago Ljubičić, Rudo Vidović i Rifat Dolić**, što je Komisija prihvatila.

Komisija je, u ime delegacije, za izvjestioca odredila Rifata Dolića. Konstatirano je da ubuduće Komisija na sjednici treba da odredi članove koji će učestvovati na određenom skupu i to prema njihovim sklonostima za neku oblast.

Mehmed Suljkanović rekao je da je do sada bila praksa, u slučaju nedostatka vremena, telefonom odrediti članove Komisije za pojedina putovanja.

Komisija je prihvatila inicijativu Vanjskotrgovinske komore BiH da ubuduće, u okviru svog djelokruga a na osnovu čl. 6. i 7. Zakona o Vanjskotrgovinskoj komori BiH, Vanjskotrgovinska komora BiH bude uključena u rad Komisije.

Sjednica je završena u 14,30 sati.

Sekretar Komisije
Emira Češljarić

Predsjedavajući Komisije
Drago Ljubičić